



---

## Communicaziun a las medias

### **Il 9avel Top Pop Rumantsch - avunda party!**

**Cuira, ils 25 da schaner 2007. - Il novavel Top Pop Rumantsch ans lascha reducir ina da las pli marcantas vuschs dal rock rumantsch: Elmar Deflorin (Ex-HADES) sgratta cun sia grupp actuala L\_MAR in pau vi dal mythos da la party sempiterna. Cun la chanzun «Adrenalin». D'udir exclusivamain sin Radio Rumantsch.**

«Tut ei cool, tut ei läss, tut ei mega» - uschia cumenza la chanzun, ed ins s'accorscha immediat, che quai n'è betg manegià en senn positiv. «Adrenalin» è la chanzun dad insatgi ch'è unfis da la buna luna sempiterna, dal sauglattismus infinit. Il chantant è dentant enconuscent per sias colurs differenziadas, ed il pli tard nua ch'el recloma «jeu hai bu pli flad» san ins che quella critica cuntegna in bel trantertun auto-ironic. Elmar Deflorin, cun ses 50 onns in dals veterans da la scena rumantscha, sa precis che ses flaivel entusiassem per la gronda party ha magari er da far insatge cun la vegliadetgna. La chanzun sezza flada dentant sorprendenta aria frestga. La grupp da rock L\_MAR - cun Thomas Gloor a las ghitarras, Benjamin Tanner al bass e Thomas Wild (da la Schmetterband!) a la batteria - è vegnida da crear in'atmosfera plain tensiun, cumbinond ina battida meccanica cun in sun detg transparent. In rock modern dad ozendi - il novavel Top Pop Rumantsch «Adrenalin».

Cumposiziun: L\_MAR; Roman Camenzind

Text: Elmar Deflorin

Producziun: Manfred Zazzi, L\_MAR

L\_MAR: Durant 15 onns ha Elmar Deflorin marcà cun sia vusch la grupp da rock sursilvana HADES. Sia dimora professiunala a Turitg ha dentant avert novas vias musicalas. Ensemen cun il ghitarrist Thomas Gloor - in Rumantsch tras maridaglia -

ha Elmar fundà l'onn 1997 la gruppa The Crimps. Passond per il quintet Shark 11 s'è lura cristallisada la furmaziun odierna. Ella porta il num L\_MAR e cumpiglia er il bassist Benjamin Tanner ed il batterist Thomas Wild, ch'ha sunà onns or en la Schmetterband da Polo Hofer. En ina fasa transitorica èn ils L\_MAR er d'udir sin l'album «Lain Fabular - ils Beatles per rumantsch».

Top Pop Rumantsch vegn era en l'avegnir ad esser in label per purschidas innovativas ed unicas en il program da musica da RR. Per l'onn 2007 èn planisadas ulteriuras producciuns. Ultra da quai vegn a cumparair en primavaira ina cumpilaziun cun las chanzuns sortidas fin qua.

Per ulteriuras infurmaziuns:

Jachen Prevost, manader redacziun da musica RR, tel. 081 255 75 75,  
jachen.prevost@rtr.ch